



Gemeinsam Äntwert vun de Ministeren fir Gläichstellung an Diversitéit, fir Gesondheet a sozial Sécherheet a fir Aarbecht op déi parlamentaresch Fro n° 1018 vum honorabelen Deputéierte Sven Clement

Déi parlamentaresch Fro 1018 bezitt sech op eng Äntwert vun der Gläichstellungsministesch op d'Fro 860 iwwert d'Ëmsetzung vum Nationalen Aktiounsplang LGBTI, deen 2018 vun der deemoleger Regierung adoptéiert gouf. D'Ëmsetzung vum Plang war Géigegstand vun enger Zwëschevaluatioun, déi vun der Universitéit vu Lëtzebuerg realiséiert, an am Abrëll 2024 publizéiert gouf. An dëser Evaluatioun gëtt ënnert anerem festgestallt, dat eng Rei Moosnamen aus dem Nationalen Aktiounsplang nach net ëmgesat goufen, an et och zum Deel net ugeduecht ass, eng eventuell Ëmsetzung weider ze verfolgegen. Des Moosname bezéien sech op verschidde Kapitelen aus dem Aktiounsplang a leien thematesch an der Ëmsetzungskompetenz vum Aarbechtsministère a vum Ministère fir Gesondheet an der sozialer Sécherheet.

Wéi schonn an der Äntwert op d'parlamentaresch Fro 860 preziséiert gouf, ass den éischten Nationalen Aktiounsplang vun 2018 fir d'Rechter vun LGBTI Mënschen ze stärke vum Familljeministère an Zesummenaarbecht mat néng anere Ministèren, der Zivilgesellschaft an den nationale Mëscherechtsinstitutionen ausgeschafft ginn. Den éischten Tëschebilan vun dësem Plang gouf am Optrag a matt der Zesummenaarbecht vum Familljeministère vun der Uni Lëtzebuerg geplangt an ausgefouert. Den MEGA ass réischt zanter November 2023 zoustänneg fir d'Koordinatioun vun der Politik fir d'Gläichstellung vun LGBTIQ+ Mënschen.

Den Nationalen Aktiounsplang gëtt elo iwwerschaft an adaptéiert, esou wéi et am Koalitiounsaccord virgesinn ass. Dëst gëtt zesumme mam Comité interministériel LGBTIQ+ gemaach, deen am Abrëll 2024 an d'Liewe geruff gouf. An deem Kontext ginn och déi Moosnamen aus dem Plang LGBTI op de Leescht geholl, déi nach net ëmgesat goufen.

Wat d'Fro 1 betrëfft zu de spezifesche Grënn iwwert d'Net-Ëmsetzung vun den opgelëschte Moosname confirméiert den Arbechtsministère¹ déi Ursaachen déi an der Evaluatioun ugefouert ginn: „*Definitionsschwierigkeiten und Probleme im Arbeitsfluss, das Fehlen einer spezifischen Gesetzgebung im Arbeitsrecht, eine Beschränkung auf ein System zur Verwaltung von Dokumenten und damit zusammenhängende Probleme, an Informationen zu gelangen.*“² Zu gläicher Zäit ënnersträicht den Arbechtsministère awer, datt déi bis zu dësem Zäitpunkt nach net ëmgesate Mesuren aus dem PAN LGBTI, intern an an Zesummenaarbecht matt der Inspection du Travail et des Mines momentan evaluéiert ginn.

¹ Chapitre 2 Mesure 1 : Réaliser un état des lieux des outils scientifiques de recueil d'information qui sont déjà en place, adapter les outils existants ou mettre en place un nouvel outil pour suivre l'évolution des discriminations en matière d'emploi au Luxembourg, y compris les discriminations liées à l'orientation sexuelle, l'identité ou l'expression de genre et la variation des caractéristiques sexuées.

Mesure 5 : Accentuer l'expertise des acteurs professionnels en la matière par des formations (Agence pour le développement de l'emploi, Inspection du travail et des mines, Ecole Supérieure du Travail, chambres patronales et salariales, syndicats, médecins du travail, travailleurs désignés, délégués du personnel...)

² Nationaler Aktionsplan LGBTI – Zwischenevaluatioun, Université du Luxembourg, p.44



Et gëtt dobäi och analyséiert, ob déi Mesuren ënnert der neier Regierung kéinten ëmgesat ginn an dee Moment och am adaptéierte Plang LGBTIQ+ iwwerholl ginn.

Genau sou confirméiert de Ministère fir Gesondheet a sozial Sécherheet déi Ursaachen déi an der Evaluatioun ugefouert ginn, ma et gëtt awer intern analyséiert wéi déi bis elo net ëmgesate Punkte kënnen am Aklang mat de Prioritéite vun der neier Regierung en place gesat ginn an sech deemno am adaptéierte Plang LGBTIQ+ erëmfanne kënnen.

Zu de Froen 2, 3 a 4 stellt de MEGA kloer, dat de Ministère zesumme mam Comité interministériel LGBTIQ+ kloer a wëssenschaftlech Critèren definéiere wäert, déi enger externer an onofhängeger Evaluatioun vum adaptéierten LGBTIQ+ Plang entsprechen. Dëst geschitt am Zesummespill matt kloer definéierte Responsabilitéite vun den eenzele Ministère an am Virfeld fixéierten Indicateuren zu deenen eenzele Mesuren, déi am iwwerschaafte Plang dann integréiert ginn. Dës Approche gouf de 15. Juli 2024 am Kader vun der éischter Reunioun vum Comité interministériel LGBTIQ+ vun der Gläichstellungsministesch annoncéiert.

Lëtzebuerg, den 19. September 2024

D'Ministesesch fir Gläichstellung an Diversitéit

(s.) Yuriko Backes